

بِسْمِ اللّٰهِ الرَّحْمٰنِ الرَّحِیْمِ



Khutba Jummah

Hazrat Khalifatullah Munir. A. Azim (atba)

03 Janvier 2020

07 Jamadi'ul Awwal 1441 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lors :

Surah Al-Kafirun

Chapitre 109 de Quran Shareef

بِسْمِ اللّٰهِ الرَّحْمٰنِ الرَّحِیْمِ
قُلْنَا اِيْمَا الْكٰفِرِيْنَ اَلْعٰبِدُ
مَا تَعْبُدُوْنَ وَلَا اَنْتُمْ عٰبِدُوْا
اَعْبَادًا وَلَا اَنَا عٰبِدُ اَعْبَادًا
وَلَا اَنْتُمْ عٰبِدُوْا اَعْبَادًا
لَكُمْ دِيْنِكُمْ وَاِلٰى دِيْنِ

Bismillah-ir-Rahman-ir-Rahim ; Qul yaaa' ayyuhal KAAFIRUUN ; Laaa 'a'budu maa ta'buduun; Wa laa antum aabiduuna maaa'a'bud; Wa laaa 'ana 'aabidum-maa 'abattum; Wa laa antum aabiduuna maaa'a'bud; Lakum Diinukum wa liya Diin.

Au nom d'Allah, Le Très Gracieux. Dire : « Ô bane non-croyants, mo pas adore séki ou adorer, et ou pas pour adore séki mo adorer, Mo pas capave adore séki mo adorer, et ou pas capave adore séki mo adorer, Ou religion pour ou, et mo religion pour moi. »

Malgré le fait ki avant l'islam bane Arabes pas ti rénié Bondié (Allah), mais zot pas ti pé reconnaite et considère Li comme le Dieu Unique et Éternel. Zot pas ti reconnaite Li par So vrai identité ki Li tousel Bondié, ki pas ena aucaine les autres bondiés dans So l'adoration et ki Li Éternel. Zot pas ti pé dévaluer Li (Allah) non plus mais zot ti pé associer bane les autres partenaires avec Li ; bane idoles ki ti supposé représente bane ancêtres pieux ou bane anges ki, d'après zot, ti bane tiffilles d'Allah. En plisse de sa, zot ti pé insinuer ki ti ena ene lien de parenté entre Allah et bane Jinns. Zot ti oublier So bane attributs et ti pé adore bane les autres idoles. Mais dans tous les cas, couma Quran dire, zot ti pé dire: **« Nous adore sa bane là, afin seulement ki zot rapproche nous près avec Allah! »** (Az-Zumar 39 : 4).

Quran dire encore: **« Si to demande zot : 'Ki sanlà fine créer bane les ciels et la terre, et faire soleil et la lune servi (l'humanité), zot sûr pou dire : 'Allah' ». (Al-Ankabout 29 : 62).**

« Si to demande zot ki sanlà faire de l'eau dessane depuis lors les ciel, et donne la vie à ene la terre ki fine mort, zot sûr pou dire : 'Allah!' » (Al-Ankabout 29 : 64).

Malgré zot croyance dans Bondié (Allah), le polythéisme [l'adoration de plusieurs dieux, bane fausse dieux] fine fausse zot concept [c.à.d., l'idée et la foi dans ene Dieu unique] et de même ki zot bane traditions et rites à tel points ki zot fine attribuer ene partie de zot di biens à sa bane [fausses] dieux là, et même zot bane zenfants. En fait, bien souvent zot ti sous l'obligation pou sacrifier zot bane zenfants. À sa sujet là, le Quran dire: **« Zot mette de coté ene part pou Allah, dans séki zot cultiver et dans zot bétail (bœuf, chameau, etc.) ki Li-même fine créer en abondance. Zot décider zot-mêmes , et zot dire : 'Sa, c'est pou Allah' et 'Sa, c'est pou nous bane associés (c.à.d., bane idoles). Part zot bane associés pas capave alle à Allah. Mais part Allah capave alle à zot associés. Ene mauvais décision sa ! Comme sa aussi, zot bane fausses bondiés faire bocou bane idolâtres trouve agréable pou touye zot zenfants, avec l'intention pou ruine zot, et mette confusion dans zot la tête lors zot religion. Si Allah ti oulé, zot pas ti va capave faire sa. Mais toi, laisse zot tranquille avec zot inventions. (Al-Anam 6 : 137-138)**

Zot dire : 'Séki dans ventre sa bane bétail là réserver pou nous z'hommes seulement, mais défanne pou nous femmes.' Mais si li mort-né, zot tous ena

ene part là-dans. Allah pou puni zot pou zot décision, car c'est Li le Sage, et Li comme tout. Zot dans la perte, bane ki touye zot zenfants, couma imbéciles, sans comme la vérité, et ki empêche servi séki Allah fine fourni zot. Zot invente bane faussetés contre Allah. Zot fine égarer, et pas fine suivre ene bon guide. » (Al-Anam 6 : 140-141).

Bane Arabes ti également convaincu ki zot ti pé suivre la religion de Hazrat Ibrahim (as) et ki zot ti mieux guidés ki bane Gens du Livre (c.à.d. bane Juifs et bane Chrétiens) ki ti pé habiter dans la péninsule Arabe à sa l'époque là; bane Juifs et bane Chrétiens ti pé prêcher la doctrine du père et du fils dans la mesure kot Uzair et Isa ti considérer comme bane fils de Dieu alors ki bane Arabes zot, ti pé adorer bane Anges et bane Jinns – ki d'après zot ti bane vrais descendants [héritiers] d'Allah. Zot ti pé maintenir ki zot croyance ti pli logique et pli envisageable ki celui de bane Chrétiens et des Juifs. Toujours est-il ki zot tous, ki li bane païens Arabes et bane Juifs et Chrétiens, zot tous ti bane polythéistes.

Kan Hazrat Muhammad (saws) fine rendre l'islam publique comme étant celui de Hazrat Ibrahim (as), sa bane là ti avance bane arguments ki pas ti ena aucune raison pou zot ki zot abandonne zot bane croyances et pou suivre le prophète parski zot ti ena même la foi. Entre temps, zot ti pé roder faire ene compromis avec li [le prophète] ki si li accepter prosterner devant zot bane idoles, alors zot pou prosterner devant Allah. Zot ti mette sa condition là aussi ki le prophète (saws) ti bizin arrêter dénoncer zot bane idoles et zot façon prier. Si seulement si Hazrat Muhammad (saws) accepter zot bane conditions, ki zot ti pou disposer pou accepter saki li (le prophète) ti pé demander zot pou faire. Sa confusion ki ena dans zot bane concepts, et ki illustré par l'adoration de plusieurs bane [fausses] dieux tout en acceptant Allah, c'est sa ki fine pousse zot pou croire ki sa fossé [c.à.d., sa grand différence] ki ena entre zot et Hazrat Muhammad (saws) là pas pou capaver être comblé. Zot ti penser ki ene accord ti toujours possible en permettant aux deux camps pou co-exister dans la région et kot sa l'accord là capaver donner zot tous les deux parties certaines concessions.

Pour éclaircir sa situation ki bien compliquer et confus, et pou faire la différence entre sa deux formes d'adoration là, entre ene doctrine et ene l'autre doctrine, c'est-à-dire, entre l'adoration d'Allah et l'adoration de plusieurs dieux, sa Surah là fine révélé dans ene façon bien autoritaire, kot Allah pé mettre les points sur les « i ». Allah pé finir mettre sa au clair pou pas ena aucune confusion possible. Sa

Surah là ti révélé dans ene telle façon afin pou tire ene la ligne de démarcation [pour faire la différence] entre le monothéisme (*Tawheed*) et le polythéisme.

En utilisant tous bane moyens ki fine mentionnés, sa chapitre là mette l'accent lors la négation en ene seule phrase, et nous trouver couma Allah fine faire sa ! Kan Allah dire le prophète (saws): « *Dire* », sa démontrer ene l'ordre divine ki transmette le fait ki la religion appartenir exclusivement à Allah; pas ena nannié ki appartenir à Hazrat Muhammad (pssl), et li démontrer ki Allah Li unique et c'est Li ki commander et décider.

Le Saint Prophète (saws) fine être ordonné pou adresse li à bane polythéistes dans sa façon là, [en ces termes]: *Dire* : « *Ô bane non-croyants !* » - Allah pé faire compran : *Sa bane là pas suive aucaine religion ki Allah fine prescrire, ni zot croire dans toi (le prophète)!* Sa Surah là mette l'emphase lors la réalité de sa différence ki dimounes pas capave ignorer.

Allah dire le prophète (saws) et bane croyants pou dire : « *Mo pas adore séki ou adorer* » et alors Allah pé rode dire ki '*Sa c'est ene affirmation ki soutenu par Moi*'. Dire zot : « *Mo pas adore séki ou adorer* »; « *Ou, ou pas pour adore séki mo adorer* ». Sa parole là li aussi répété pour mette plisse l'emphase lor là afin pou élimine tout bane tentative de doute et de mauvais interprétation de sa Surah là.

Ene telle l'attitude ti essentielle afin pou expose bane désaccords fondamental dans l'essence des deux croyances et doctrines, dans la source de sa deux concepts là et dans la nature de sa deux chemins là: (c.à.d.) le monothéisme et le polythéisme ; la foi et la non-croyance.

En somme, sa distinction là li indispensable pour bane ki invite les autres à l'islam et aussi bien ki bane dimounes zot-mêmes parski bane concepts ignorants capave alle mélangé avec celui de l'islam, plus particulièrement dans bane sociétés ki ti adopté le mode de vie islamique et ensuite fine détourne zot de sa. L'ignorance étant séki li été, ena selman ene sel solution : li (c'est-à-dire, sa l'ignorance là) bizin disparaître par li-même pour laisse place à bane principes islamiques.

Premier l'étape dans sa domaine là consister à amène le *Dai-illallah* (Celui ki pé prêche l'islam et pou vine vers l'adoration d'ene sel Dieu, vers Allah) pou reste loin de l'ignorance. Li bizin sépare li de sa à tel point ki pas ena aucaine lien entre

li et l'ignorance jusqu'à saki bane ignorants embrasse complètement l'islam. La base même de la personnalité de sa prêcheur (*Dai-Allah*) là bizin clairement être le fait ki li complètement différent de sa bane dimounes ignorants là. Zot ena zot religion, et li, li ena saki pou li. So travail consister pou oriente (dirige) zot lors le droit chemin. Au cas ki li pas réussi dans sa travail là, li bizin détache li complètement de zot cercle et déclare ouvertement: « À ou, ou religion, et à moi mo religion ». [*Ou religion pour ou, et mo religion pour moi.*]

Le *Dai-Allah* faudé pas bizin perdi de vue le fait ki li pé appelle bane dimounes à l'islam, bane tel dimounes ki zot croyances fine complètement dévié de la vérité, et li bizin maziné ki li pé faire sa travail de *Dawat-i-Allah* là dans ene société ignorant ki hostile à l'islam. Li bizin prend conscience ki pas ena place pour bane compromis. Et li bizin faire le tout pour le tout pou présente l'islam dans tout so clarté, en contraste avec la conception ignorant de bane dimounes. Li bizin affronte zot avec courage et dire zot directement, sans aucaine zig-zag : « À ou, ou religion, et à moi mo religion »

Nous religion li basé lors le monothéisme pur et absolu ki so bane concepts, valeurs, croyances et so bane la lois couvert tous bane aspects de la vie humaine et zot vine d'Allah et de personne d'autre.

Sans sa distinction là, la confusion et le doute pou persister. Alors nous, nous bizin dire : L'islam pas pou capave être bâti lors bane fondations faibles et ambigües [ki pas stable/ instable], mais li pou capave être bâti lors la fermeté, la clarté, la franchise et la fortitude [lors le courage et bravoure dans bane moments d'extrêmes difficultés] pareil couma Allah fine ordonne nous pou déclarer : « *Ou religion pour ou, et mo religion pour moi.* »

Sa ti méthode ki ti employée dans bane premiers jours de l'islam pour appelle bane dimounes vers le chemin d'Allah. Et sa méthode là bizin toujours continuer être employé aussi dans nous l'époque afin ki la vérité retrouve so splendeur et ki la non-croyance disparaite de la société mondiale. Sa c'est ene travail ki demande bocou zéffort, non pas pour nous propre profit, mais pour le bienfait de toute l'humanité, parski la croyance en ene Dieu Unique bizin d'emblée faire nous lé cœur batté couma dans ene sel lécorps. *Insha-Allah.*